

DUWAMUSU ADUIRUYILI O JULU

MUGUKIYITSI LA WATSON GOODMAN

MUENSILI — TSIRI USUMBA

DUWAMUSU ADUIRUYILI O JULU

Nyimaronda uguvega "DUWAMUSU ADUIRUYILI O JULU." Kabogu mu mugand' egugu guranga mambu na bibuku bimambu maNsambi abimawarisi. Nyijabi yiri mavindugulu mabibuku mavu muna mambu maNsambi.

Mambu maNsambi meruyili "o julu" na mavu mawelimina uwarisa mirima mibatu abavu na nsala uba basungama. Ava mutu ekalulili diela avana ebusili masumu na enengili Fumu Jésus-Christ utsana nandi. Diwendi rie: Emuvayili tindi yitu mbana Fumu okelasa ombu gandi nomubasa de na nsangu na duvotsu. Nyimavayila Fumu yitu mu yilima yi 1937, na ubandila na yilima yieni nyisakabunsa dinonga diami na Fumu. Pa ndeju gusakagobulu, kokolu tsiagu, ne namunyi muvayili yitu nogobulu yiri oba tindi Fumu agu.

-Watson Goodman (1920-2002)

Romains 5:8

Tumba Nsambi amatulasa tindi durondu ava mbe tuki bavayitsi bamasumu, Christ amatufuila.

Jean 13:1

Ne fête Pâque jikatola, Jésus amajaba yiri diweru diandi dimatola usila bisi bulongu buebubu uwenda ombu Taji. Amarondanga abamatsananga nandi na amabarondulilanga te na bamakakana.

Apocalypse 1:5

Jésus-Christ aguvu mbeji jisigama, aguvu tsomi mu abafu, na aguvu Fumu bakaga babutamba, adugabili maboti mandi na duvotsu duandi wandi. Jandi eturondi na ava amafuila amatugusulila masumu.

Jérémie 31:3

Kala kala Fumu amalabana nami novosa rie: Nyimaguronda puela. La dibandu nyimagubambisinina nami.

Jean 3:16

Nsambi amaronda bisi bulongu puela, la dibandu amaveyila Muana andi divingu, yiri uotsu oyimuvayili yitu akebungana, tumba abi na monyu umutubu.

I Timothée 3:16

Muna yimaga yi yivu mu muyitsa etu! Nsambi amakaluga mutu, na dusungugu duandi dumalasu na Yinyunyi yiandi, amalabana na biansa, amasamunu o malongu motsu, amavagulu yitu na bisi butamba na amamatusu o julu.

Jean 14:9, 10

Jésus amamuwivula rie: Ngensa gusakanjaba Philippe? Menu agumatsinga nenu? Jandi agumandaba amalaba Tata; tsie guivosili rie: Tulasi Tata? Gugejabi yiri nyimafubana murima na Tata, na Tata amafubana murima nami?

Matthieu 1:22, 23

Motsu mana mamalabana udugusu ama mubiyitsi amavosila Fumu rie: Tsiemi odila dimi, obura muana dibaala, na bomuluga Emmanuel (divindugulu rie: Nsambi aii netu).

Jean 1:1 na 14

Ne Nsambi akasunda bulongu vamaba mutu diina diandi Diambu, na Diambu dimaba na Nsambi, na Diambu dieni dimaba Nsambi. . . Diambu dimaburu mutu agumatsananga va gari etu, ubasa de na maboti na ngensa na bundumba. Bundumba bueni bumaba abu jandi agumaba Muana divingu amadila ombu Taji.

JESUS MUANA NSAMBI

I Jean 4:15

Jandi aguisingisili yiri Jésus la Muana Nsambi, Nsambi amafubana murima nandi na jandi amafubana murima na Nsambi.

Esaïe 9:5

Muana umatuburulu; Muana dibaala umatuvegu; Durumu duotsu dumugengila na bomunengilanga rie: Usimunu, Mulongitsi, Nsambi mangolu, Taji mutubu, Kaga duvotsu.

Luc 1:35

Yiansa yimamugabusila rie: Yinyunyi yiNsambi oruga ombu gagu, na mangolu maNsambi ajivu

jineni mogukelisanga. La dibandu muana onengulungu Muana Nsambi.

Colossiens 2:9

Jabanu yiri Christ amaba tindi Nsambi ne amaba na dunyuru dumutu.

Matthieu 17:5

Ava jandi amavosila nana dimungi dimasunda na dimabagumba na yijalala yineni. O gari dimungi umagulunu diufi adimavosa rie: Agugu la Muana ami udurondu, agu nyimaronda na murima ami uotsu. Mugululuanu!

4 JESUS UTUBULA ETUBULI ANYI AVU

Jean 11:25

Jésus amamutsingula rie: Menu la durambugu na monyu. Jandi oyipayili yitu odila monyu nesi amafu.

Jean 8:23

Jandi amabatsingula rie: Jenu duji bisi tsi; menu nyiji muisi julu. Jenu duji aba bulongu buebubu; menu ngaa agu bulongu buebubu.

Jean 6:35

Jésus amabatsingula rie: Menu la mapa mamonyu. Jandi oyiruyi ombu gami agogulu nsala, via, na jandi oyipayili yitu agogulu puila. Jean 9:5

Ava nyikivu mu bulongu, nyiji yijalala yibulongu.

Jean 13:13

Jenu duindengili Mulonsi na Fumu; duivayi buranga mu mbari anana nyivu.

Jean 10:7

Jésus amabatsingula rie: Dingensa menu nyivu munu ndagu bindombu.

Jean 8:58

Jésus amabatsingula rie: Dingensa ne Abraham akaburu, menu nyimaba nana nyivu.

BIMAGA BIMOSI ABI JESUS AMAVAGA

Matthieu 14:19-21

Mbana amaruma yinombu rie: Tsananu. Amabonga mapa meni maranu na nyama beji, amanangula misu o julu amagabusila Nsambi diboti. Amabukula mapa na amamavega ombu badukitsi: badukitsi bamagabila yinombu. Botsu bamaji na bamagukuru. mbana badukitsi bamabola digumi na ponsi beji tsibibuku abimasialulu. Jogu abamaji bamaba tosini yiranu tsibabaala tsiri utala bagetu na baana.

Luc 5:4-6

Ava jandi amamanina ulonsa amayosa na Simon rie: Wendanu avavu ndonga, jenu na bambatsi bagu uyebuaga mbusa tsienu. Simon amamugabusila rie: Mulonsi, tutsivuba mukolu uotsu na tugadila banyama; tumba mu diambu diagu, nyuleweliga. Banotsibuaga bamadila nyama tsipuela, na mbusa tsimabupasiga.

Matthieu 20:30 na 34

Bidunga bibeji bimaba bitsana va mugula nsila. Banogulu yiri oyivioyi la Jésus bamagamuga rie: Fumu, Muana David tulasi yingeba. . . Jésus amabalasa yingeba na amabemba misu mogu; vana vana misu mogu mamatiemuna na bamamuduka.

Jean 1:3

Bima biotsu bimasundu nandi, na vagaa ne yimosi mu abimasundu ayisamasundu nandi.

Actes 2:36

Kabogu baIsraël botsu bajabi buranga yiri jandi agu jenu dumagomina va kurusu, Nsambi amamuvaga Fumu na Christ.

I Corinthiens 1:9

Nsambi agotamba nodugusu pangini tsiandi jandi omadunengila yiri dunonga na Muana andi, Fumu etu Jésus-Christ.

Colossiens 1:16

Jandi amasunda bulongu; abivu o julu na abivu vava tsi; abilabini na abigelabini, na aberumi butamba buebubu wandi, diwendi rie: Bafumu na barumitsi. Nsambi amasunda biotsu nandi na biotsu biyu abiandi.

Hébreux 1:2

Tumba va temu tsietsitsi tsiusita Muana andi amasunda bulongu. Nsambi va mosi na Muana andi amasunda bulongu; la jandi agu Nsambi amabiatsa uba Fumu bima biotsu.

Romains 14:9

Christ amafu na amarambuga o dufu yiri orungula uba Fumu ombu abamafu nombu abavu monyu.

JESUS-CHRIST AJI NSONSI JIBOTSU

Romains 2:16

Mu yilumbu ayi Nsambi otabulila batu bunsonsi adina diulabana mu mbari Jésus-Christ opalisa amamasuegu. Adina Musamu Uboti agu nyilonsi uinsinguli.

II Timothée 4:1

Jaba yiri Nsambi otabulila botsu bunsonsi, jogu abavu monyu na abamafu.

Actes 10:42

Amatusindiga ulonsa batu nosingisila bumbeji bujandi agumasolu na Nsambi utabulila abavu monyu na abamafu bunsonsi.

Matthieu 25:32

Malongu motsu mobenguna va gusu andi. Jandi ogaba batu nana mubungulitsi ekakisini bindombu na binsabi.

Jean 5:22

Taji agetabulili mutu bunsonsi, tumba amavega bunsonsi buotsu ombu Muana.

Romains 14:10

Dibandu yi guitabulili muana Taji agu bunsonsi? Dibandu yi guilensili Taji agu? Tsia Nsambi otutabulila bunsonsi?

Jean 14:6

Jésus amamugabusila rie: Menu nyivu nsila, na nyivu ngensa na monyu. Ne mutu akawenda ombu Tata vengu oleruga ombu gami.

Jean 8:24

La dibandu nsidutsingulila yiri jenu dufu mu masumu menu. Diwendi rie: Dufu mu masumu menu pa dugepayili yitu yiri menu nyivu.

Hébreux 5:9

Anodugu amakaluga Mugobutsi ombu botsu abomudedila.

Actes 4:12

Vagaa mutu ususu oyigobuli na vagaa diina disusu adimajabunu na batu, adivu na mangolu ugobula.

Jean 10:9

Menu la munu ndagu. Pa mutu ekoti muna, jandi ogobulu; okotanga na opalanga, na odilanga biguji.

Hébreux 7:25

Kabogu botsu aberuyi ombu Nsambi mu diina diandi bogobulu mu mbari aji mutubu na ebalendili Nsambi.

CHRIST BUANDI AVU MUGOBUTSI

Colossiens 1:12-14

Gabusilanganu Nsambi Taji enu diboti na nsangu, jandi omaduwelimisa udila dikabu va mosi na abandi abamapalila o pisama jimasumu. Jandi amatugobula ava tukivu o tsi pisama eni na amatubega te no Durumu duMuana andi udurondu agumatujeyisa na agumatutandila masumu.

Luc 19:10

Muana Mutu amaruga uyiromba nogobula abatsiemuga.

I Corinthiens 1:30

Diwendi rie: Tumafubana mirima na Christ na Nsambi amasindiga Christ uba diela dietu. Christ amatusungiga na Nsambi, amatuvaga baana baNsambi na amatujevisa.

Tite 2:14

Jandi amakevega mu diambu dietu na amatugobula mu mabi motsu, diwendi rie: Amatuvaga batu bandi abamaliomusu abavu liyiyi na nsala uvaga maboti.

Apocalypse 5:9

Bamawimbila duimbu dugona rie: Ndeju guwelimina ukakula abimanamugu nobonga dibuku, mu mbari gumaboku na dufu duagu gumabega batu ombu Nsambi. Diwendi rie: Malongu motsu, mbembu tsiotsu na batu botsu.

Ephésiens 1:7

Christ anofu tumajegusu na masumu metu mamatandu. Muna maboti ma Nsambi amatulasa, monyi masamaba na difuimba.

I Jean 1:7

Tumba pa yijalala yivu netu nana yivu na Nsambi ja' beni tuna dinonga jetu nandi na malungu maJésus, Muana andi metuliomisingi masumu motsu.

I Pierre 1:18, 19

Muna dufunu du dumafutu udugobula, diwendi rie: Udujeyisa mu nsanunu tsienu tsikulini atsi bivunda bienu bimadulonsa. Jabanu yiri dusamagobulu na bima abibungini nana mbongu vo lora.

Ava mbe dukivu na nsanunu tsikulini atsi dumawiji ombu bataji benu dumagobulu na malungu maChrist ojivu nderi yindombu ayigaa na yifu.

Romains 5:9

Pa dufu duandi dumatusungiga na Nsambi, ja' beni agorungula utusagulila kabu Nsambi?

Hébreux 9:14

Lesa bionyi bimaba biwelimina ubaliomisa tambusa na malungu maChrist? Na mangolu maYinyunyi yimutubu amakevagula pagu jidugu ombu Nsambi. Malungu mandi motuliomisa yiri turungula usaliia Nsambi aiivu monyu.

OYIVAYILI CHRIST YITU OGOBULU

Ephésiens 2:8, 9

Dumagobulu na maboti ma-Nsambi ava dumamuvayila yitu. Dugobutsu la pegulu Nsambi: dugeruyili ombu genu. Dugaa na musuga unyema mu duonyi dugeruyili mu bisalu bienu.

Romains 5:1

Yitu yinotusungiga na Nsambi tuka na duvotsu mu diina diFumu etu Jésus-Christ.

Galates 5:6

Ava tuifubinini mirima na Jésus-Christ durebu dugaa na diambu. Adiviolila motsu la yitu ayifuningi na durondu.

I Jean 5:4

Mu mbari uotsu agumaburu na Nsambi ana mangolu ubelisa bisi bulongu. Diwendi rie: Tubelisa bisi bulongu mu diambu diyitu yietu.

Jean 20:31

Mambu memama mamasonu udulasa yiri Jésus aji Christ, na aji Muana Nsambi; pa duimuvayili yitu dudila monyu.

Jean 6:28, 29

Jogu bamamuwivula rie: Yi tuvaga udugusu yisalu yiNsambi? Jésus amabagabusila rie: Yisalu yiNsambi yivu uvayila agu jandi amasindiga yitu.

Psaume 103:11

Tsie mutu ojabila nana julu jivu vala na butamba? Divu dedi mosi na yingeba yiFumu, mutu agojaba nana yivu yineni ombu jogu abegobisi Fumu.

Michée 7:18

Anyi avu Nsambi nana ndeju? Anyi etandi mabi? Anyi elibini masumu mabansialutsu bagu? Gugekelisi kabu agu mutubu mu mbari guna yingeba.

Psaume 103:17

Yingeba yiFumu yivu mutubu ombu jogu abemuyitsi na maboti mandi magesuki nesi te na kula tsipuela.

Psaume 108:5

Lesa dualu dugaa na disukusulu tambusa na yingeba yiagu Fumu, ngensa bundumba buagu buitugumbi nana mamungi megumbili butamba.

Lamentations 3:22, 23

Yingeba yiFumu yitukelisi yiri tugebungini, maboti mandi magekamuyi, kedi na kedi melabini nderi mavu magona: Usigama uandi uvu tindi uneni.

Tite 3:5

Jandi amatugobula. Tusamagobulu mu diambu dibisalu biboti abi tumasala tumba mu diambu

ruyili ombu Nsambi oyiveyi duburu dugona nesi monyu ugona.

NSAMBI ETUNENGILI

13

Matthieu 11:28

Ruganu ombu gami, jenu botsu adumatogulu mifuna, nyudumuna kata.

Apocalypse 22:17

Yinyunyi yiNsambi na mugatsi bevosi rie: Rugati! Botsu abegulu mambu memama bevosi wandi rie: Rugati! Uotsu oyigulu puila, aruyi. Uotsu oyirondi mamba mamonyu amadila muensili.

Jean 7:37

Yilumbu yiusita yimaba yilumbu yineni yifête. Muna yilumbu yieni Jésus amavosa rie: Pa mutu ana puila aruyi ombu gami uyinu.

Esaïe 55:1

Jenu botsu aduigulu puila ruganu uyinu, nesi pa dugaa na mbongu. Yibonganu ne malamu ne mabenyi muensili.

Esaïe 1:18

Fumu evosi rie: Tukamoganu, labatianu ne pa dumavaga masumu, diwendi rie: Dumabivisa bikutu na matodi; ne nana nyumaliomisa liolioli na pa matodi mavu mabenga riri nyumavemisa ve.

BATU BOTSU BAGAA BAANA BANSAMBI 14

Philippiens 2:15

Banu baana baNsambi badugu abagaa na mbela ava betsanini va gari bisi butamba buebubu. Nana bambuelili belulili o iulu anana wandi vengu dulasa vijalala.

Jean 1:12

Tumba ombu botsu abamamudila, ombu jogu abamavayila diina diandi yitu, jandi amabavega musuga uba baana baNsambi.

II Corinthiens 6:17, 18

La dibandu Fumu amavosila rie: Palanu va gari ogu nokakana nogu, duyabemba ayivu muinsi na nyududila na nsangu. Fumu mangolu motsu amavosa rie: Nyuba Taji enu na jenu duba baana bami.

I Jean 3:10

Baana baNsambi na baana badiabu bejabunu. Uotsu agugeduki dusungugu na agugerondi muana Taji andi agaa muana Nsambi.

Romains 8:14, 15

Botsu abewendusu na Yinyunyi yiNsambi baji baana baNsambi. Mu mbari Yinyunyi avi Nsambi amaduvega agedukotisi o buviga na agedulasi goma tumba edunengili baana baNsambi na Yinyunyi yieni etuveyi musuga ugamuga rie: Tata ami!

MALONGI MANSAMBI MU DIAMBU DIMALAMU MAMANGOLU

Galates 5:19-21

Amavu na bumutu amama rie: Buvuyisa, muinsi, bupumbi, dusambu dubakosi, mavanda, divina, mitsundu, ngusu, kabu, dugabu, miyitsa, diwavi, malangi, uviosulila uji, na mambu mamunongu eni. Nyibuesi udulubusa nana nyimaledulubusila rie: Jogu abevayi minongu mimambu meni bagoiaba Durumu duNsambi.

Esaïe 5:11

Muna maguga ma jenu balangitsi dulaba! Jenu aduimani miusa unuanganga te na mukolu uotsu, tindi maguga dulaba!

Romains 13:13, 14

Kabogu tutsanianu buranga nderi wisi umatebuga; tuyamuelanganganu, tuyamuevaganganu bumbembu, tuyatoganganu na tuyawayasananga.

Proverbes 23:31, 32

Guyagengila malamu mabenga, amevayi binsiensi mu kopa, amavu disoga. Disoga dieni dikaluyi nderi miangala minyoga.

Matthieu 22:37, 38

Jésus amamugabusila rie: Ronda Fumu Nsambi agu na murima agu uotsu na matasa magu motsu na mangolu magu motsu. Adidi la diruma adiviolili motsu.

Marc 10:17-22

Mulonsi uboti, yi nyuvaga udila monyu umutubu? Jésus amamugabusila rie: Mu mbari vi guindengili muboti? Vagaa muboti yika Nsambi. Guijabi maruma memama: Guyaboka; guyavaga bumbembu; guyadaga; guyafura; guvadionga batu; vitsa taii agu na nguji. Jandi amamugabusila rie: Mulonsi, ubongila va bungebi buami nyimakelisa maruma memama motsu. Jésus amamugengila visuisu, amamuronda puela; amayosa nandi rie: Vaki diambu dimosi! We' yesumbisa biotsu abivu nagu, novega badoli ombu bijaga mbana guba na busina o julu. Mbana ruga, nduki! Tumba dibaala dieni anogulu nana amatunga dusisi na amayenawenda na munyongu mu mbari amaba yisina yineni.

Proverbes 16:25

Ombu mutu uotsu va nsila aiilabini nderi jivu jiwelimina tumba disukusulu dijionyi divu dufu.

DUYADUNSU

Ephésiens 5:6

Duyagulu posulu tsibuduka atsirunguli ududunsa mu mbari botsu abetsigulu bolaba kabu jiNsambi.

I Corinthiens 6:9, 10

Jenu dugejabi yiri batu babi bagojaba Durumu duFumu? Duyakedunsa; ne bivuyisa, ne basambilitsi babakosi, ne bimbembu, ne babaala abevayi dijamba na babaala nogu, vo bagetu abevayi munongu mosi, ne badayitsi, ne bango nyinga, ne balangitsi, ne bango lanyi, ne bikongu bagojaba duonyi. Jacques 1:22

Duyakedunsa! Pa duigulu mambu maNsambi, madukianu wandi.

I Jean 3:7, 8

Baana, duyadunsu! Jandi oyiduki dusungugu aji usungama nana Christ avu usungama. Oyivayingi masumu aji mutu diabu mu mbari ubanda va dibandu diabu evayingi masumu.

Galates 6:3

Pa mutu etasi yiri aji mutu muneni, diuleba agaa muneni ekedunsi.

Ezéchiel 18:20

Oyivayi masumu oyifu. Muana agokilusu mu diambu dimasumu mataji munongu mosi na taji agokilusu mu diambu dimasumu mamuana. Mutu usungama osaku; amavaga maboti na mutu mubi agosaku; amavaga mabi.

Jacques 1:15

Yiotsu ayi mutu esingi urumu na nsala tsiandi evayi masumu na masumu meni morungula umuduta o dufu.

Romains 8:6

Aberumu na yimumutu bofu tumba aberumu na Yinyunyi yi-Nsambi bana monyu na duvotsu.

Luc 15:32

Tumba divu diwelimina yiri dulamba mulambu nosangila mu mbari muana nguji agu mbe amafu na amarambuga, mbe amatsiemuga tumba amamuelabana!

Proverbes 11:19

Mutu muboti edili monyu, mutu mubi yika dufu.

Romains 5:12

Masumu mamakota o bulongu mu diambu dimutu mosi, diina diandi Adam na disumu diandi dimabega dufu. La dibandu dufu dumadugunu batu botsu mu mbari botsu bamayaga masumu.

CHRIST AMABELISA DUFU

Luc 7:14, 15

Mbana Jésus amakueka ombu gogu; amabemba yigara yimfumbi na babaala abamayibeganga bamasikama. Jésus amaruma rie: Mufudu, rambugati! Amatsana na amabanda uyosa.

Jean 11:43, 44

Anomana uvosa nana amagamuga rie: Lazare, pala! Mfumbi jimapala, makulu na miogu bitungu na yinsi yipietu na tsanda. Jésus amabatsingula rie: Munyangulianu na mudundianu, awendingi.

Jean 10:17, 18

Taji etondi mu mbari nyikeveyi, nesi te na dufu, yiri o gusu nyudila monyu. Mutu agokoma tumba me' beni nyina nsala ukevega. Nyina musuga ukevega na nyina musuga udila monyu. Nyimadila musuga eni ombu Taji ami.

Apocalypse 1:18

Nyiji monyu, nyibetsi nyifu tumba laba nyiji monyu umutubu. Nyina musuga uotsu udufu, nesi mbura atsi abafu bavu. Deutéronome 5:7-21

Guyayitsa nsambi tsisusu yika menu.

Guyavala bima biuyitsa; nesi bibagunu bibatsoli, ne bibibulu, ne binyama tsimamba. Guyakutama va gusu bionyi na guyabisalila. . .

Guyasundila uleva pesi mu diina diami pa gugaa na ditasa ukelisa pangini eni.

Kelisa yilumbu yitsona yingitsi nana Fumu Nsambi agu amagurumina. Guna musuga usala bilumbu bisiamunu buandi; tumba ayimusambuali yivu yingitsi yiFumu Nsambi agu.

Yitsa taji na nguji agu nana Fumu Nsambi amagurumina...

Guyaboka.

Guyavaga bumbembu.

Guyadaga.

Guyafura.

Guyanyungila mugatsi umutu nagu nesi ndagu andi, nesi nungi andi, nesi basalitsi bandi, nesi ngombi andi, nesi buru andi ne vima viotsu ayivu nandi.

GUGORUNGULA USUEMA NSAMBI

Luc 8:17

Vagaa diambu adimasuegu adigojabunu na vagaa fundu ajigowansulu muansu.

Job 34:21, 22

Nsambi elabi bifu bibatu botsu, na egengili mutu mutu yisuisu. Ne mukolu na pisama bigorungula usuega bayayitsi bamabi.

Psaume 139:8 na 12

Pa nyimati o julu guji guna; pa nyisunduyi o mbura aji batu abefu bavu guji vana wandi. . . Ne pisama jigesueyi mabi ombu Nsambi, misu mandi melabi mukolu na nyangu dedi, diwendi rie: Elabi yika yijalala na yijalala.

Jérémie 23:24

Fumu ewivuli rie: Va mbura aji mutu orungula ukesuega aji ngomuemulaba? Tsie ngaa mu mbura tsiotsu nesi o julu nesi va butamba?

Proverbes 15:3

Fumu egengili motsu. Diwendi

22 ABAGEDUKI FUMU BOKILUSU MUTUBU

Matthieu 13:41, 42

Muana Mutu osindiga biansa biandi ugaanga aberombisi batu uvaga mabi na bavayitsi bamasumu botsu. Biansa bieni biubabuaga o muji aguneni, aguna bolilanga na bonyonganga.

Matthieu 18:8

Pa dikaka diagu nesi dikulu diagu digutsimbusu ditabuli nodibuaga; tsiri diambu diviolila uvura ukota o julu na dikaka dimosi vo dikulu dimosi, tumba divu diambu ukota o bulungi bumuji ne pa guna bilema biotsu.

II Pierre 3:7

Tumba julu na butamba abivu netu biukelusungu na diambu adimavosu na Nsambi te na biusielusunu na muji, diwendi rie: Te na batu botabululu bunsonsi nobungana.

Psaume 9:18

Bavayitsi bamasumu bobuagu o bulungi bumuji va mosi na malongu motsu amelibini Nsambi.

Matthieu 25:46

Kabogu jogu bovioga o diguga dimutubu tumba abasungama bovioga o monyu umutubu.

BUNSONSI BUVU O GUSU

Actes 17:31

Jandi amakunsa yilumbu ayi ofundisila batu botsu na dusungugu; bofundusu na mutu agu jandi amasola. Amadilasa ombu batu botsu aya amarambusila mutu eni o dufu!

II Pierre 2:9

Kabogu Fumu ewamusi batu abemuduki na mbangulu tsiogu; batu babi ekelisingi te na yilumbu yibunsonsi.

I Jean 4:17

Yilimba ayilasi yiri durondu dumatudugunu l' ayiyi rie: Tugoviva yilumbu yibunsonsi na goma mu mbari nsanunu tsietu tsivu dedi na jiChrist.

Hébreux 9:27

Mutu uotsu ofu mbana Nsambi omutabulila bunsonsi.

Romains 14:12

Kabogu mutu mutu odendulila Nsambi mandi motsu.

II Corinthiens 5:10

Jetu tutabululu bunsonsi na Christ na mutu mutu odila adivu diwelimina na bisalu biandi. Diwendi rie: Pa mutu amasala bisalu biboti ava amabila vava tsi odila maboti; munongu mosi pa amasala bisalu bibi okilusu.

MABOTI MAJESUS-CHRIST

II Corinthiens 9:15

Tugabusilianu Nsambi diboti va mosi mu diambu dimuensili andi aguiviolili miotsu.

I Pierre 5:5

Nsambi etutsi bango dunangu tumba elasi mavolambombu maboti mandi.

Actes 4:33

Bilumbi bimaba na mangolu usingisila bumbeji budurambugu duFumu Jésus mu mbari miula mineni mimabagabulu.

Romains 5:15

Tumba botsu babeji bagaa dedi. Maboti maNsambi magorungula uwelimina na dibi diAdam. Divu dingensa yiri bapuela bamafu mu diambu didisumu didibaala dimosi. Tumba yingeba yiNsambi yivu yineni, amatuvega muensili aguiviolili miotsu la dibaala dimosi, diwendi rie: Jésus-Christ aguvu uviolila botsu.

II Corinthiens 8:9

Jenu duijabi nana maboti ma-Fumu etu Jésus-Christ mamafuninanga: jandi amaba yisina tumba mu diambu dienu amakaluga yijaga, bujaga buandi buiduveyi busina.

Romains 9:16

Kabogu adi mutu erondi nesi abi esali bigaa na diambu; motsu mebandi na yingeba yiNsambi,

DUKALULU DUDIELA

Matthieu 3:2

Jandi amavosa rie: Kalulanu diela mu mbari Durumu duNsambi duka bebeli.

II Corinthiens 7:10

Utsira agu Nsambi elabi uwelimina uikalusi mutu murima na uibeyi dugobutsu wandi, tumba utsira uotsu ususu uibeyi dufu.

Luc 13:3

Nyidutsinguli rie: Pa dugokalula diela, jenu botsu dufu nana jogu bamafuila.

Actes 3:19, 20

Kabogu kalulanu diela na gabuganu ombu Fumu, yiri masumu menu motandu. Mbana oduvega duvotsu.

Actes 17:30

Nsambi agemuerangimina buduka abu batu bamalevaganga tumba erondi yiri batu botsu bakaluli diela.

Actes 2:38

Pierre amabatsingula rie: Kalulanu diela, batusuanu mu diina diJésus-Christ yiri masumu menu modutandu. Mbana dudila pegulu jiNsambi, diwendi rie: Yinyunyi ayiruyili ombu gandi.

Ezéchiel 18:31

Libananu nsimbulu tsienu tsiotsu atsimadurombisa uvaga masumu; banu na bifu bigona na matasa magona. Dibandu yi jenu baana balsraël dufuila kulini?

Esaïe 55:7

Mutu mubi abusi nsila andi, na muvayitsi mabi adundi matasa makulini; Agabuyi ombu Fumu ogumulasa yingeba nombu Nsambi agugotamba nomutanda.

Actes 5:31

Nsambi amamumatisa va mabaala mandi uba Kaga na Mugobutsi yiri baIsraël bokalula diela notandu masumu mogu.

Marc 2:5

Jésus anolaba yitu yiogu amavosa na yibomfi rie: Muana ami masumu magu mamagutandu.

Matthieu 6:14

Pa jenu duitandili batu basusu mabi mogu, Taji enu ajivu o julu odutandila wandi.

Ezéchiel 18:21

Pa mutu mubi obusa masumu mandi nobanda udedila migaga miami novaganga amavu mawelimina na masungama ngensa obanganga monyu, agofu, via!

Apocalypse 3:20

Laba, nyirelama va diguyi na nyidukisi. Pa mutu egulu diufi diami na endibulili, nyukota na jetu nandi tuji va mosi.

DUKAKUSUNU DUMAMBU MABUTAMBA

Ephésiens 5:11

Duyabambana na batu abevayi mambu makulini o tsi pisama jimasumu tumba matubulianu.

Esaïe 1:16

Builanu, banu dulioma, ngemueronda ulaba mabi menu, dundanu umayaga.

I Jean 2:15, 16

Duyaronda bulongu nesi mambu mabulongu. Pa mutu erondi bulongu durondu duTata dugaa nandi; mu mbari motsu mavu mu bulongu — nsala tsimusonyi, nsala tsimisu na dunangu — mageruyili ombu Tata tumba mavu mabulongu.

Colossiens 3:2

Keveganu mu mambu majulu na tsiri amavu mu butamba.

Tite 2:11, 12

Maboti maNsambi mamalabana ava dugobutsu dumavegulu,
aduvu duwelimina ombu botsu.
Monyi metulonsi ubusa mabi na
dunyungi noba na diela na dusungugu nobagunu na Nsambi ava
tuitsanini vava tsi na ava tuivivili
yilumbu yieni.

DUBURU DUGONA

II Corinthiens 5:17

Pa mutu efubini murima na Christ, ekaluyi nderi mutu ugona avu: motsu magulu mamavioga na magona memavingi.

I Pierre 1:23

Mu mbari dumaburu duburu dugona tsiri na bataji abefuangingi tumba na Taji ajigefu; ajivu monyu umutubu.

Ezéchiel 36:26

Nyuduvega mirima migona na matasa magona amavu masungama. Nyuduvega yinyunyi yigona na nyudugusulila mirima migala amimabivusu na masumu na nyuduvinsila mirima amibasa na durondu.

I Jean 2:29

Duijabi yiri Christ avu asungama kabogu uotsu aguvu asungama aji muana uNsambi.

I Jean 5:18

Tuijabi yiri uotsu omaburu na Nsambi agemuevayingi masumu mu mbari Nsambi emukelisi yiri diabu agorungula umubemba.

Jean 3:3

Jésus amamugabusila rie: Dingensa nyigutsinguli yiri pa mutu agoburu duburu dugona, agorungula ujaba Durumu duNsambi.

MASUMU LA DUFU --- CHRIST LA MONYU

Ephésiens 2:1 na 6

Mbe 'ka jenu mbe dumakefuila mu diambu dikanda tsienu nesi masumu menu; . . . Tunofubana mirima na Christ; maboti maNsambi mamatugobula.

Colossiens 3:1

Kabogu pa jenu dumarambuga na Christ, rombanu mambu majulu, aguna Christ avu atsana va mabaala maNsambi.

I Pierre 2:24

Ava jandi amafuila va kurusu, masumu metu mamatsiemuga vana, la dibandu turungulila utsana abasungama. Mu diambu dimapura mandi jenu dumabeluga.

Galates 5:24

Jogu abamafubana mirima na Jésus-Christ bamabokisa bumutu na nsala tsiandi.

Romains 6:2 na 11

Jetu tumabokisa nsala tsimasumu. Tsie tumuevayilanga masumu? . . . Munongu mosi rangiminanu jenu wenu yiri ava dumafuila nandi dumabokisa masumu na monyu agu dumadila uvu u-Nsambi mu mbari dumafubana mirima na Jésus-Christ.

Jean 3:14, 15

Nana Moise amanangulila nyoga o kumu, munongu mosi Muana Mutu vengu omatusu, yiri uotsu agumuvayila yitu odila monyu umutubu.

Romains 6:23

Yisaku yimasumu la dufu tumba muensili uNsambi la monyu umutubu ombu jandi omafubana murima na Jésus-Christ Fumu etu.

Jean 5:24

Dingensa nyidutsinguli rie: Jandi oyigulu mambu mami, na evayili omansindiga yitu, jandi ana monyu umutubu na agovegu mbela, tumba amagusuga o dufu na amavioga o monyu.

Jean 17:3

Monyu umutubu la gugu rie: Ujaba yiri ndeju guvu Nsambi mosi buandi jingensa, nojaba yiri jandi agu gumasindiga, la Jésus-Christ.

Galates 6:8

Pa mutu evari miaga amivu na tsombi, miaga mieni miboli; tumba oyivari miaga miboti edili magondi. Munongu mosi jandi oyidugusu nsala tsibumutu odila dufu; tumba jandi oyidugusu nsala tsiYinyunyi yiNsambi, Yinyunyi omuvega monyu umutubu.

Romains 8:16

Yinyunyi yiNsambi efubini murima netu na evosi rie: Duji baana baNsambi.

I Jean 4:13

Tuijabi yiri tumafubana mirima nandi na jandi amafubana murima netu mu mbari amatuvega Yinyunyi yiandi.

I Jean 3:18, 19

Baana, durondu duenu duyaba duleli mu mbari durondu dungensa duilasi bilimba: mirima misunda va gusu Nsambi. Kabogu turungula ujaba yiri tuji baana baNsambi abavu na ngensa pa mirima mietu migetuveyi mbela.

Galates 4:6

Ulasa yiri tuji baana bandi, Nsambi amasindiga Yinyunyi yi-Muana andi ufubana murima netu. Yinyunyi yieni egamuyi rie: Tata ami!

Jean 14:21

Jandi oyigulu mambu mami na emakelisi etondi. Taji ami emurondi mu mbari etondi; menu wami nyumuronda na nyukelasa ombu gandi.

Esaïe 32:17

Dusungugu duiveyi duvotsu, mbana duibuesi yivumu na murima usunda.

CHRIST OYIFUBINI MURIMA NAGU EGUFUNISILI NSANGU

Romains 14:17

Ava Durumu duFumu dujabununu tugomuekipa biguji ne binuigu tumba turumu na Yinyunyi ayiruyili ombu Nsambi ayiutulasa dusungugu na duvotsu na nsangu.

Galates 2:19, 20

Nyimagomunu va kurusu va mosi na Christ, kabogu monyu aguvu nami ugaa uami tumba aguvu uChrist agumafubana murima nami; la dibandu nsanunu ajivu nami jivu nana mu mbari nyimavayila Muana Nsambi yitu, jandi agumatonda na agumakevega mu diambu diami.

Esaïe 12:3

Ka muna nsangu ji tulaba utega mamba mamonyu o yileka yidugobutsu!

Jean 15:11

Nyimadutsingula mambu meni yiri dulaba nsangu nana nyijilabili, na nsangu enu jiuba jineni.

Psaume 16:11

Ndeju gunjabisa nsila monyu; ombu gagu uvu yika nsangu na nsangu; na va mabaala magu vavu maboti mamutubu.

DEDILA FUMU AGU

I Samuel 12:15

Pa duibusi udedila diufi diFumu nokelisa maruma mandi odukilisa nana amakilisila bataji benu.

Romains 6:16

Dugejabi rie: Ava duikeveyila ombu mutu vengu dumudedila, diwendi rie: Duji baviga bandi. Pa tsiri muviga masumu amorombisa dufu, kabogu muviga dululu adurombisa dusungugu na Nsambi.

II Thessaloniciens 1:7-9 Ovega jenu adumalasu maguga yivumu va mosi netu. Fumu Jé-

sus odivaga ava oruyila o julu na biansa biandi bimangolu, boruga na mulutsu muji ukilisa jogu abagejabi Nsambi na jogu abagededili Musamu Uboti uFumu etu Jésus. Mukilu ogu uba dubungu dumutubu na bokakana vala na Fumu na bundumba bumangolu mandi.

Deutéronome 11:26-28

Namunyi nyiduveyi dusolu: mula uNsambi vo mulogu uNsambi. Dugabulu mula pa dudedila maruma ama Fumu Nsambi enu oduvega namunyi na mulogu pa duimabusi. Matthieu 10:32, 33

La dibandu uotsu aguvosa va misu mabatu yiri amafubana murima nami, menu nyumusingisila va gusu Taji ami rie: Tuji murima mosi. Tumba uotsu agukala va misu mabatu, nyumugala va gusu Taji ami ajivu o julu rie: Ngemujabi.

Romains 10:9, 10

Pa guinyemi va misu mabatu yiri Jésus-Christ aji Fumu na pa guivayili yitu na murima uotsu yiri Nsambi amamurambusa o dufu, gugobulu. Mu mbari oyivayili yitu na murima uotsu vana vana amasungugu na Nsambi na

oyinyemi Christ vana vana amawarisa dugobutsu duandi.

I Jean 2:23

Uotsu oyigali Muana egali Taji wandi. Uotsu oyimemi Muana ememi Taji wandi.

Luc 9:26

Pa mutu olaba yisonyi mu diambu diami, Muana Mutu wandi omulasa yisonyi ava oruyila ulasa bundumba buandi na buTata na bubiansa biNsambi.

Philippiens 2:11

Botsu bosamuna yiri Jésus-Christ la Fumu adina diuba na bundumba ombu Tata Nsambi.

SATAN LA TINDI

Matthieu 4:1 na 10, 11

Mbana Jésus amabegu na Yinyunyi yiNsambi o kumu, uyemangu na diabu. . . Jésus amamuwaka rie: Ndundi Satan! Disonugu rie: Yitsa yika Fumu Nsambi agu nomusalila buandi. Kabogu diabu anomusila vana vana biansa bimamuvinga na bimasalila Jésus.

Actes 26:18

Gubalasa kengili yiri bagusuyi o pisama jimasumu novioga o yijalala, Gubalonsa wandi yiri bakakini na Satan nobambana na Nsambi. Pa bopayila yitu nyuba-

MUVINITSI ETU

tandila masumu na bodila mbura va gari abamasolu na Nsambi.

I Pierre 5:8

Banu sui na lubuganu. Nana magena eleyili ayi oji munongu mosi diabu ojivu muvinitsi enu, edulevi.

II Thessaloniciens 2:9

Durugu duMulensitsi eni duba na mangolu maSatan na jandi olasa minongu miotsu mibimaga na bilimba bimfurulu.

Ephésiens 6:11

Duaranu bitogulu biotsu abi Nsambi eduveyi yiri durungula ubusa ndunsulu tsidiabu.

II Thessaloniciens 2:8

Mbana Mulensitsi olabana na Fumu Jésus omuboka na punga ajiupalila munu andi na omubunga ava olabinina na bundumba buandi.

Jacques 4:7, 8

Kabogu keveganu ombu Nsambi, busanu diabu na jandi odurina. Bambananu na Nsambi na jandi obambana nenu.

Hébreux 2:14

Baana beni aba amarangula bavu batu la dibandu Jésus ja' beni amakaluyila mutu yiri oba na dunyuru nana nyuru tsiogu. Amasinga dufu yiri diabu obungu,

jandi agumaleba na mangolu madufu.

Romains 8:35 na 37

Diambu yi diutukakasana na durondu duChrist? Vagaa diambu, ne diguga ne goma ne dikuana ne nsala ne penyi ne yidungu ne dijenga. . . Mu motsu mana turungula ulunga mu mbari tumafubana mirima na jandi omaturonda.

I Jean 3:8

Oyivayingi masumu aji mutu diabu mu mbari ubanda va dibandu diabu evayingi masumu. Muana Nsambi amaruga uyibunga yisalu yidiabu.

DURONDU LA YILIMBA YIBUDUKITSI

I Corinthiens 13:1

Ne pa nyuvosa mambembu mabatu nesi mabiansa, pa ngaa na durondu, posulu tsiami tsivu nana mukuku aguidimbu vo nana dumbumbu aduinsieyirini.

Galates 5:22, 23

Tumba Yinyunyi ayiruyili ombu Nsambi efunisi durondu, nsangu, duvotsu, pugu, yisagumunu, maboti, usigama, buvolambombu na usunda.

I Jean 3:14

Tuijabi yiri tumarina dufu na tukavu na monyu mu mbari tuirondi baana baTaji. Agugerondi muana Taji andi avu nderi afu kala.

I Jean 4:20

Pa mutu evosi rie: Nyirondi Nsambi tumba evini muana Taji andi aji mufuritsi; mu mbari jandi agugerondi muana Taji andi agu elabi tsie orondila Nsambi agu agelabi?

Jean 13:35

Anana botsu bojaba yiri duji badukitsi bami, pa duirondisiningi.

Jean 21:16

Jandi amamuemuwivula adimubeji rie: Simon muana Jean, guitondi? Pierre amamugabusila rie: Nyiina, Fumu guijabi yiri nyigurondi. Jésus amamuruma rie: Bungula bindombu biami.

Actes 10:39-41

Jetu tuji bambeji bamambu motsu ama jandi amayaga o Judée te no Jérusalem. Jogu bamamugomina va kurusu avana amabokulu. Tumba Nsambi amamurambusa o dufu mu yilumbu ayimurieru na amamuvega musuga ukelasa ombu batu. Asamalabana ombu batu botsu yika ombu jetu atumasolu na Nsambi uba bambeii. Nsambi anomurambusa o dufu, ietu tumaji na tumanu nandi.

Romains 4:25

Jésus eni amavegu mbela dufu mu diambu dimabi metu na amarambuga o dufu utusungiga na Nsambi.

Jean 20:26-28

Tsona mosi jimavioga na badukitsi balésus bamamueba o ndagu, na Thomas amaba nogu. Ndagu jimaba jibindama tumba Jésus amasundila ukota na amavosa rie: Sunsanu mirima! Mbana amanengila Thomas rie: Ruga vibembisa mulembu agu va mivedi miami! Gengila makaka mami! Kotisa dikaka va dubansi duami. Guyamuetumuna paga, payili yitu. Thomas amamugabusila rie: Fumu ami na Nsambi ami!

DURAMBUGU LA ADIVIOLILI

Matthieu 16:21

Ubongila va temu eni Jésus amabanda ulonsa badukitsi bandi rie: Vengu nyuwenda o Jérusalem aguna bivunda na bavagulitsi bapagu na milonsi mimigaga bondasa maguga. Va julu vana nyuboku na nyurambuga o dufu mu yilumbu yimurieru.

Jean 5:25 na 28, 29

Dingensa nyidutsinguli rie: Diweru diruyi, na dimaruga kala adi bamfumbi bogululu diufi di-Muana Nsambi; na jogu abodigulu bodila monyu. . . Duyakambulu mu dionyi; mu mbari diweru diuruga adi botsu abavu mu

DITASA DIETU UBUEJI

mangila bogululu diufi diandi, na bopala. Jogu abamavaga maboti borambuga na ndunga, tumba jogu abamavaga mabi borambuga na mbela.

Romains 6:3-5

Duyalibana rie: Ava tumabatusulu tumafubana mirima na Jésus-Christ, nesi na dufu duandi. Kabogu batema jilasi yiri tunotsigu nandi tumafubana na dufu duandi, yiri tudila monyu ugona munongu mosi nana Christ amagudilila ava amarambuyila o dufu na mangolu maTata. Pa tufubana na dufu duandi tufubana na durambugu duandi wandi.

DUSUNGUGU DUFUMU

Luc 1:74, 75

Otuwamusa na batu abetuvini notugusula goma yiri tumusalila na mirima misunda. Yiri tuba basigama na bawelimina va gusu andi te na mutubu.

II Corinthiens 7:1

Bambatsi badurondu, pangini tsietsitsi tsimavangunu netu! Kabogu tukeliomisanu, tsiri yika nyuru tsietu tumba na binyunyi wandi yiri tuba tindi balioma. Tutsanianu na goma jiNsambi.

II Timothée 2:21

Munongu mosi na jetu batu pa mutu agaa na mbela mu mbari ebusi mambu mamuinsi obagunu na yipela ayivu na yisalu yineni; yimaliomusu na yimawelimina ombu Fumu yionyi umusalila bisalu biotsu biboti.

I Pierre 1:2

Dumasolu na duganu duNsambi Tata na maboti maYinyunyi yiNsambi yiri dudedila Jésus-Christ noliomusu na malungu mandi. Maboti maNsambi na duvotsu bibi nenu.

I Pierre 1:15

Tumba banu na nsanunu ajisoyini na jandi omadunengila, diwendi rie: Nsambi.

DUSUNGUGU DUFUMU

Hébreux 13:12

La dibandu Jésus amafuila o tsomu dimbu yiri oliomisa batu na malungu mandi.

I Jean 1:9

Pa tuitubulili Nsambi mabi metu jandi aji usigama na usungama otutanda mabi metu notuliomisa tindi uliomosa.

Matthieu 3:11

Nyidubatisi na mamba ulasa yiri dumakalula diela; tumba jandi oyiruyi o nsima ami odubatisa na Yinyunyi yiNsambi na muji. Jandi epiolili mangolu, menu nyisawelimina umuvula pondu tsiandi.

Esaïe 35:8

Voba nsila jigona; nsila eni jiunengulungu nsila jidusungugu. Mutu mubi agojivioyila. Nsambi ja' beni oviosila batu muna, ne biduka bagojitsimbu.

Ephésiens 1:4

Ne bulongu bukasundu Nsambi amaketusolila uba abandi va mosi na Christ yiri tuba batu baNsambi abagaa na mbela.

Actes 4:31

Ava bamamanina usambila, mbura aji jogu bamaba bagukama jimasisana; jogu botsu bamabasu na Yinyunyi ayiruyili ombu Nsambi na bamalonsanga mambu maNsambi na bukidi.

Actes 1:8

Ava Yinyunyi ayiruyili ombu Nsambi osunduyila ombu genu, dudila mangolu.

Ezéchiel 36:27

Nyudukotisila Yinyunyi yiami yiri dudila migaga miami nesi motsu ama nyidurumi.

Actes 13:52

Badukitsi bamabasu na nsangu na Yinyunyi ayiruyili ombu Nsambi.

Luc 11:13

Lesa jenu babi duijabi uvayila baana benu maboti, tambusa na Taji ajivu o julu! Agovega Yinyunyi yiandi ombu botsu abemuwiyuli?

Romains 8:9

Tumba jenu dugeduki yimumutu mu mbari Yinyunyi yiNsambi aji nenu la dibandu duiduki Yinyunyi yiandi. Ogaa na Yinyunyi yiChrist agaa mutu andi.

PANGINI TSINSAMBI OMBU ABANDI

Psaume 34:19

Fumu ekelisi abelabi maguga mamunongu na munongu na egobuli abavu na mirima misunduga.

Esaïe 66:2

Fumu evosi rie: Dikaka diami dimasunda butamba na julu; biotsu abivu muna abiami. Ne nana nyulasa yingeba ombu divolambombu adivu na murima usunda na oyireyimini ava egululu mambu mami.

Apocalypse 21:4

Jandi obatsindulila matsanga motsu. Vagomueba ne dufu. ne bukuili, ne matsanga, ne buali. Motsu magulu mamatsiemuga.

Psaume 37:3

Vayila Fumu yitu, na vayila batu maboti, mbana gutsananga sui na gulisulungu.

I Pierre 4:12, 13

Bambatsi badurondu duyakambulu ava duilabili purulu nana nderi tsivu diambu digona. Tumba labanu ubueji mu mbari duilabi maguga va mosi na Christ yiri ava bundumba buandi bulabinina jenu wenu dulaba ubueji na nsangu va mosi nandi.

44 PANGINI TSINSAMBI

Romains 8:28

Tuijabi rie: Mu motsu Nsambi esungiyi mambu yiri abemurondi na abamanengulu nandi bowamusu.

Esaïe 43:2

Ava guisabuyili mijamba nyuba nagu, na mijamba migogudiamisa, via! Ava guivioyili va gari kangi gugonyenga,

I Corinthiens 10:13

Vagaa dumangu, ne dumosi, adumalabana ombu genu adusakalabana ombu basusu tumba Nsambi ekelisi pangini andi, agogaru yiri dumangu duduviolila; tumba

OMBU ABEMANGUNGU

temu aji dumangu oduwarisa yiri dugodeda.

Psaume 34:20

Mutu usungama elabingi maguga tumba Fumu emuwamusingi na monyi.

Hébreux 2:18

Kabogu orungula uwarisa jogu abamamangu mu mbari ja' beni amamangu ava amawarila maguga.

Romains 16:20

Mua pesu temu Nsambi duvotsu obetsa Satan.

Apocalypse 3:12

Jandi ogulunga nyumuvaga dikutu dindagu Nsambi adigomuegusulu. Nyusona diina diinsambi ami va dunyuru duandi, na diina dimusiengi uNsambi ami, diwendi rie: Jérusalem jigona ajisunduyili ombu Nsambi ami. Va julu vana nyusona diina diami digona va dunyuru duandi.

Apocalypse 2:7

Jandi oyigulu alubuyi! Agulu ama Yinyunyi yiNsambi evosi ombu bisi mabundu rie: Ombu botsu abamalunga nyubavega musuga uji milunda mimuiri umonyu aguvu o nungi jiNsambi.

Apocalypse 3:21

Botsu abolunga botsana nami o bufumu buami mu mbari menu wami nyimalunga na nyimatsana na Taji ami va yitsiga yiandi o bufumu buandi.

Apocalypse 21:7

Jogu abelungi bodila pegulu ejiji; nyuba Nsambi ogu, na jogu boba baana bami.

Apocalypse 3:5

Botsu abolunga boduisu bikutu bivema na ngotsindula miina mogu mu dibuku dimonyu. Va gusu Taji ami na biansa biandi nyuvosa kengili rie: Baji abami.

MALONGI MANSAMBI MU DIAMBU DIUBOKA DIWELA

I Corinthiens 7:10, 11

Ombu baana baTaji abawela nyiveyi diruma, (tsiri menu tumba Fumu) rie: Mugatsi ayaboka diwela na mulumi andi, pa amaboka diwela atsani, ayamuewelu, vo agabusili ombu mulumi andi, na mulumi wandi ayagusula mugatsi andi.

Romains 7:2, 3

Legengilatianu mugaga udiwela: Mugetu-mawela aji atungu na mulumi andi ava mulumi aki monyu. Pa mulumi amafu mugaga uirumi rie: Agaa atungu aji nana. Tumba pa mulumi andi aki monyu yika ewelu na dibaala disusu aji yimbembu; tumba pa mulumi amafu na ewelu na dibaala disusu agevavi bumbembu.

Luc 16:18

Uotsu aguigusuli mugatsi andi nowela ususu evayi bumbembu na uotsu aguiweli mugetu agumagusulu na mulumi andi evayi bumbembu.

Matthieu 5:32

Tumba nyidutsinguli rie: Dibaala oyigusuli mugatsi andi ne pa mugetu agaa na diambu emurumi uba yivuyisa na jandi oyiweli mugetu eni evayi bumbembu.

DURUGU ADUMUBEJI DUCHRIST

Jean 14:3

Nyuwenda udutsonsiyila mbura kabogu pa nyimamana udutsonsiyila mbura nyumuegabuga uyidulanda yiri tuyetsana va mosi.

Marc 8:38

Pa mutu olaba yisonyi mu diambu diami na mu diambu dimalongi mami mu temu ejiji kabogu Muana Mutu wandi omulasa yisonyi ava oruyila ulasa bundumba buandi na buTaji na bubiansa.

Apocalypse 3:11

Uruga nyiruyi. Kelisanu amavu nenu yiri dugopatulu dugaba.

Jacques 5:8

Jenu wenu banu na pugu! Duyatsiemusa ditasa mu mbari Fumu uruga eruyi.

Matthieu 24:27

Mu mbari durugu duMuana Mutu dubila nana dusiemu aduirambuyili o wisi epalili na duilabini te no wisi ewendisini.

Matthieu 24:30

Mbana yilimba yiMuana Mutu yiulabana o julu, batu botsu bogamuga na Muana Mutu oruga va gari mamungi na bomulaba na mangolu maneni na bundumba.

DURUGU ADUMUBEJI DUCHRIST

I Jean 3:2

Bambatsi badurondu namunyi tuji baana baNsambi tumba tusakajaba nana tubila o gusu. Tumba tuijabi adidi rie: Ava Christ olabinina tubagunu nandi mu mbari Christ avu ulioma.

Apocalypse 16:15

Gulu, nyiruyi nana muifi. Muna ubueji gu jandi aguvu na dukanda na oyibambi mivuatu miandi olaba, jandi aguna agorasunu penyi, diwendi rie: Agogaangu na yisonyi.

Actes 1:11

Bamabawivula rie: Jenu bisi Galilée, dibandu yi duisikimini ugengila o julu? Jésus eni ajitsimatusulu va misu menu, omueruga munongu mosi nana atsiwendila.

Luc 21:27

Mbana bolaba Muana Mutu eruyi na mangolu na bundumba va gari mamungi.

Luc 12:40

Jenu wenu banu dukunsama mu mbari Muana Mutu oruga mutsoga.

Matthieu 16:27

Mu mbari Muana Mutu yika uruga eruyi na bundumba buTaji andi na bubiansa, mbana ofuta botsu nana bamasalila.

MAMBU MANSAMBI

Julu na butamba biutsiemuga tumba mambu mami mogotsiemuga, via!

-Luc 21:33

Mbembu agu jivu nderi lambi ajimbonitsi nsila yiri ngoduku dibaku.

-Psaume 119:105

Bisonu biotsu biruyili ombu Nsambi na bivu biwelimina ulonsa ngensa, novega mbela, nosiemba, nolonsa dusungugu. —II Timothée 3:16 Tumba mbigulu tsiotsu tsimaruyila na mangolu maYinyunyi yiNsambi agumavega batu bulumbi buNsambi.

-II Pierre 1:21

Jésus amabagabusila rie: Jenu duna mbela mu mbari dugetsiyisi Bisonu na dusakajaba mangolu maNsambi.

-Matthieu 22:29

Nyurangiminanga mambu magu yiri ngoguvayila dibi.

-Psaume 119:11

Text reprinted from the Bible in Yipunu by permission of United Bible Societies Africa Regional Centre, Nairobi, Kenya.

Published in numerous languages by World Missionary Press as God supplies funds in answer to prayer. If you would like more copies for careful distribution, please write to us in English.

World Missionary Press, Inc. P.O. Box 120 New Paris, IN 46553-0120 USA